

RM11 juta projek tebatan banjir

SHAH ALAM – Kerajaan negeri melalui Jabatan Pengairan dan Saliran (JPS) meluluskan peruntukan RM11 juta untuk projek tebatan banjir Sungai Aur fasa 5 bagi mengatasi masalah kawasan tadahan iaitu Bandar Puteri dan Taman Sentosa serta sekitarnya.

Exco Infrastruktur, Kemudahan Awam, Pemodelan Pertanian dan Industri Asas Tani, Zaidi Abdul Talib berkata, melalui projek ini, Rancangan Tebatan Banjir (RTB) Sungai Aur fasa 5 menyediakan infrastruktur saliran utama yang sempurna seterusnya dapat menyalurkan air banjir dua kawasan itu dan sekitarnya ke Sungai Aur.

"Pada masa ini, sistem saliran utama yang tidak sempurna dan tidak mencukupi menyebabkan limpahan air banjir daripada sistem saliran yang sedia ada termasuk kolam takungan yang dibina pernah.

"Kolam takungan itu dilihat tidak dapat menampung akibat saluran keluar kolam takungan ke sistem saliran utama yang tidak dinaik taraf sehingga ke Sungai Aur me-

nyebabkan limpahan air banjir berlaku di sekitar kawasan kolam takungan," katanya ketika menjawab soalan tambahan daripada Shuhaimi Shafiei (PKR-Sri Muda).

Beliau berkata, pelaksanaan RTB Sungai Aur ini dilihat dapat mengatasi masalah banjir monsun yang berulang akibat sistem saliran utama yang tidak sempurna dan tidak mencukupi.

"Isu banjir kilat yang disebabkan masalah sistem saliran dalaman perlu diatasi pihak berkuasa tempatan (PBT) bagi melancarkan pengaliran dalaman.

"Bagi tujuan itu, kerajaan negeri akan melaksanakan projek tebatan banjir di Sungai Aur Fasa 5, Klang melibatkan kos RM10,300,000," katanya.

Menurutnya, ia melibatkan kerja menaik taraf sistem saliran utama (Sungai Aur) menggunakan konkrit u-blok serta membina jambatan medium traffic bridge (MTB).

"Selain itu, kerajaan juga akan membina kolam takungan banjir di Taman Sentosa

serta menaik taraf kolam takungan sedia ada di Bandar Puteri dengan kos RM3,300,000.

"Ia melibatkan kerja menaik taraf sistem saliran di Taman Sentosa melibatkan kos RM6,325,000 yang melibatkan saliran sedia ada di Jalan Datuk Yusof Shahbudin dari u-drain ke box culvert sepanjang 875 meter.

"Selain itu kita juga akan menaik taraf saliran sedia ada di Jalan Raja Nong KFC dari u-drain ke box culvert sepanjang 557 meter dan di Jalan Datuk Dagang 6 dari u-drain ke box culvert sepanjang 760 meter," katanya.



Zaidy ketika memberi penerangan pada Sidang Dun.